

06 MAY 1999

Mahkamah-Anwar

BANTAHAN AWAL SAMAN RM100 JUTA ANWAR TERHADAP SUN DITOLAK

KUALA LUMPUR, 6 Mei (Bernama) -- Mahkamah Tinggi di sini hari ini menolak bantahan Datuk Seri Anwar Ibrahim terhadap permohonan Sun Media Corporation Sdn Bhd bagi mahkamah membicarakan beberapa isu dalam saman fitnah RM100 juta Anwar sebagai isu-isu permulaan.

Mahkamah itu juga memutuskan untuk mendengar permohonan Sun Media untuk melupuskan saman bekas Timbalan Perdana Menteri itu, esok.

Hakim Datuk R. K. Nathan membuat keputusan itu selepas mendengar hujah peguam Karpal Singh yang mewakili Anwar dan Datuk V. K. Linggam bagi Sun Media.

Sun Media yang memfailkan saman dalam kamar pada 6 April meminta perintah mahkamah mengenai beberapa isu berkaitan persoalan kelayakan keistimewaan seperti yang diakui dalam pembelaan terhadap saman Anwar itu.

Saman dalam kamar itu disokong oleh affidavit pengarah Sun Media Tan Sri Abdul Rahim Din yang berkata adalah wajar bagi mahkamah membicarakan isu-isu itu sebagai isu permulaan demi kepentingan keadilan, untuk menyegerakan penghakiman dan mengambil kira kos yang terbabit.

Dalam affidavit balas yang difailkan pada hari Isnin, Gobind Singh Deo, seorang lagi peguam Anwar berkata tuntutan Sun Media dalam permohonan itu merupakan salah anggapan dan adalah tidak wajar bagi mereka untuk menyelesaikan perkara itu sebagai isu-isu permulaan.

Gobind berkata Anwar layak dibicarakan dalam perbicaraan penuh dengan mengambil kira perbalahan bahawa pembelaan terhadap kelayakan keistimewaan tidak diberikan kepada Sun Media.

Anwar, 51, menyaman Sun Media kerana menyiarkan perkataan fitnah menerusi artikelnya bertajuk "Anwar's behaviour is despicable: PM" pada 23 Sept tahun lepas.

Dalam kenyataan tuntutananya, Anwar berkata Sun Media menerbitkan perkataan fitnah terhadapnya tanpa mengesahkan fakta itu dengannya sebelum menyiarkannya.

Menurutnya Sun Media menyiarkan semula perkataan itu pada 28 Jan, 1999 di bawah tajuk "Report On Sodomy and Masturbation" selepas saman itu dikemukakan dan oleh yang demikian membuat keuntungan daripada penjualannya.

Dalam samannya Anwar juga memohon injunksi untuk menghalang Sun Media, yang sebelum ini dikenali sebagai Sun Media Group Sdn Bhd, pengarah-pengarah, kakitangan dan/atau ejen daripada menyiarkan secara lanjut fitnah yang serupa terhadapnya.

Anwar juga memohon faedah terhadap jumlah itu, kos dan relif lain yang difikirkan patut oleh mahkamah.

Dalam kenyataan pembelaan yang difailkan pada 11 Mac, Sun Media yang mengakui menerbitkan perkataan-perkataan itu menegaskan bahawa ia disiarkan berdasarkan perlindungan bersyarat.

Syarikat itu berkata ia adalah sah serta bertanggungjawab moral dan sosial baginya untuk menyiarkan perkataan-perkataan itu kepada pembaca akhbar tersebut, The Sun, yang mempunyai hak untuk menerima maklumat itu.

Kenyataan pembelaan itu turut terkandung teks penuh mengenai apa yang dikatakan oleh Perdana Menteri Datuk Seri Dr Mahathir Mohamad pada sidang media yang diadakan pada 22 Sept tahun lepas dan juga soalan-soalan yang dikemukakan oleh wartawan.

Syarikat itu mendakwa adalah tanggungjawab Dr Mahathir untuk menjelaskan kepada orang ramai mengenai pelucutan jawatan Anwar dan adalah

menjadi tugas media menyampaikan penjelasan itu kepada orang ramai kerana mereka mempunyai minat bersama untuk mendengar penjelasan itu.

Dalam jawapannya Anwar mendakwa Sun Media gagal mengambil langkah berhati-hati yang bersesuaian ketika menyiarkan perkataan-perkataan itu walaupun beliau (Anwar) menafikan terbabit dalam salahlaku seks sebelum itu.

Menurutnya perlindungan bersyarat itu tidak wajar dinikmati oleh Sun Media.

Secara alternatif Anwar berkata perlindungan bersyarat itu tidak berkesan kerana Sun Media sebenarnya "digerakkan oleh niat jahat" ketika menerbitkan perkataan-perkataan yang menyinggung itu.

Katanya Sun Media juga tidak melakukan sebarang usaha untuk mengesahkan kebenaran perkataan yang menyinggung itu daripadanya atau pihak-pihak yang didakwa terbabit dengannya dalam salahlaku seks yang didakwa itu.

Anwar juga berkata Sun Media menerbitkan perkataan itu kerana mengetahui bahawa dia berada dalam tahanan Akta Keselamatan Dalam Negeri dan oleh itu tidak dapat memberikan jawapan.

-- BERNAMA

SBB LAT